

**OIC Gesa Myanmar Tamatkan Keganasan Dalam Negara  
Bernama  
25 Oktober, 2012**

KUALA LUMPUR, 25 Okt (Bernama) -- Pertubuhan Kerjasama Islam (OIC) mengutuk rusuhan yang tercetus di daerah Minbyar di negeri Rakhine, Barat Myanmar baru-baru ini, mengakibatkan tiga orang terbunuh dan memusnahkan tempat ibadat serta lebih 400 buah rumah.

Dalam satu kenyataan, Setiausaha Agung OIC Ekmeleddin Ihsanoglu menggesa kerajaan Myanmar supaya mengambil semua langkah yang perlu untuk menamatkan keganasan terhadap puak minoriti Rohingya dan memulihkan ketenteraman.

Laporan menyebut bahawa rusuhan terbaru itu, yang tercetus pada Ahad malam, adalah yang terburuk dilaporkan antara penduduk Islam Rohingya dan penganut Buddha daripada etnik Rakhine, sejak pertempuran kecil melanda wilayah itu pada Jun, menyebabkan sekitar 70,000 orang hilang tempat tinggal.

Ihsanoglu berkata keganasan yang merebak itu adalah kesinambungan peristiwa yang bermula Jun lepas dan mengorbankan beratus-ratus orang manakala beribu-ribu lagi hilang tempat tinggal.

"Laporan mengenai pemindahan paksa, keganasan yang disasarkan kepada wanita, termasuk rogol dan kemusnahan kediaman serta kampung adalah amat dikesali," katanya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=704821>